

Prava osnova za optimizam

Odnosi između zemalja Jugoistočne Evrope su bolji nego ikada, izjavio je danas visoki predstavnik Valentin Inzko tokom razgovora sa visokim dužnosnicima u Bukureštu, te je dodao da uslovi stvoreni unutar Bosne i Hercegovine i izvan nje sada omogućavaju zemlji da napravi značajan iskorak.

Tokom razgovora sa g. Bogdanom Manoiujem, savjetnikom rumunskog predsjednika Traiana Basescua za vanjsku politiku, i gđom Luminitom Odobescu, državnom tajnicom pri rumunskom ministarstvu vanjskih poslova, visoki predstavnik je izrazio zahvalnost na dugogodišnjoj podršci Rumunije Daytonskom mirovnom sporazumu, između ostalog i njenim aktivnim učešćem u EUFOR-u.

Visoki predstavnik je istaknuo da će daljnju ulogu OHR-a u Bosni i Hercegovini odrediti kapacitet bosanskohercegovačkih stranaka da ispune pet ciljeva i dva uslova Vijeća za provedbu mira te je naglasio da OHR i Delegacija EU sarađuju blisko i međusobno se dopunjuju kako bi pružili optimalnu podršku bosanskohercegovačkim partnerima.

U uvodnom obraćanju prisutnima u Rumunskom državnom univerzitetu odbrane, visoki predstavnik je rekao kako vjeruje da bi Bosna i Hercegovina mogla okrenuti novi list nakon višegodišnjeg političkog zastoja.

“Građani BiH više ne žele slušati stare, istrošene argumente. Oni žele da njihovi lideri počnu nuditi nova rješenja za probleme koji se već predugo ne rješavaju”, rekao je visoki predstavnik.

Visoki predstavnik je naglasio da je usvajanjem nekoliko strateških zakona i postizanjem dogovora između vodećih stranaka o ključnim pitanjima “u proteklih nekoliko mjeseci Bosna i Hercegovina uspjela otkloniti ozbiljne, dugotrajne

prepreke koje su sprečavale njen napredak. Sa stanovišta prve polovine 2012. godine, vjerujem da postoji prava osnova za optimizam – možda prvi put nakon više godina.”